

MUSEO TA NECESIDAD COMO CU PUEBLO TIN HAMBER PA ARTE

ORANJESTAD (AAN): Nos pueblo tin hamber pa arte.

Asina e pintora local Julie Oduber ta bisa den un entrevista cu DIARIO.

Segun Oduber, di tempo di Carib Art ta obvio cu e pueblo di Aruba tin un necesidad grandi pa wak obranan di arte.

Manera ya conoci, Carib

Art tabata un exposicion enorme cu a trata arte di pintornan di henter e region Caribense.

Por corda cu el a tuma lugar den centro di bario Caiquetio y a wordo bishita door di gran cantidad di hende local.

Oduber ta conta cu e tempo ey un mama a expresa e interes aki bon ora cu el a bisa

un di e organizadoman cu e ta contento cu Carib Art pa motibo cu su yiu tin un "hamber" pa loke tin di haber cu arte y cultura.

E pintora ta di opinion cu ta un obligacion moral pa duna pueblo loke e kier y asina haci nan soño y tambe di e artistanan Arubano bira realidad.

Pa e motibo ey Oduber tin

ya 25 aña bogando pa un museo di arte aki na Aruba mes.

Antes un ke otro tabata difícil como cu nos isla no tabata conta cu bastante artista.

Awendia si y prueba di esaki ta cu tin no menos cu 200 artista inscribi na Instituto di Cultura.

Oduber ta muestra tambe

riba e balor educativo di arte y ta kere cu un museo lo contribui bastante na formacion di nos muchanan.

Manera ya conoci, varios artistanan local a uni den un grupo cu ta boga pa harmonia entre artistanan y ta bringa pa promove arte na Aruba.

Pa por logra nan tin diferente exposicionnan planea durante henter aña, es decir un pa luna.

Tema di e luna aki ta Carinaval.

E pinturanan ta na exposicion, y tambe na venta, na Art & Frames.

E idea pa bin cu un exposicion tocante Carinaval, asina Oduber ta conta, a nace dos aña pasa.

E pintora ta encanta cu e por a wordo realiza porfin y ta invita tur hende pa pasa wak e bunita exposicion.

Por corda cu Oduber tabata den noticia siman pasa cu su idea pa bini cu un museo di Carinaval.